

25. Juli 2019

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatta inuiattut timersornikkut unammersuarterfissaanik FIFA-p piumasaqaataanut naapertuuttumik pilersitsinerup avataaniit aningaasaliissussarsiuunnissaanut periarfissanik aningaasalersueriaasissatut ilusissamillu misissuisussanik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaq aningaasalersuinissamik misissuinerup inerneranik UKA2020-imi Naalakkersuisut Inatsisartunut saqqummiutissagaat.

(Inatsisartunut ilaasortaq Anders Olsen, Siumut)

Tungavilersuut:

Inatsisartut 2015-imi uparnaakkut ataatsimminneranni nunatta inuiattut timersornikkut unammersuarterfissaanik qulisamik "Nationalstadion"-imik pilersitsinissaq illugu Naalakkersuisut nassuiaasioqqullugit siunnersuuteqarnerma kinguneraa pilersaarummik imaqarluartumik ukiakkut 2016-imi nassuiaammik sanaartornerup nalaani aammalu aallartinnginnerani suliarineqartussanik imaqartumik Inatsisartunut agguaassipput.

Pilersaarummi unammersuarterfissap sanaartorneqarnissaani aningaasat tagginneqarsimasut ikigisassaangillat, taamaattumillu sanaartornissaq pilersitsinissarlu eqqarsaatigalugit pissusissamisoorluinnartutut isumaqarfigaara arlalinnik aningaasaliisoqarnikkut aatsaat unammersuarterfissap piviusunngortinneqarnissaa aqutissaasoq. Taamaattumillu aningaasaliissussarsiorneq peruseralugu sanaartornissap piviusunngortinneqarnissaa avaqqunneqarsinnaangitsutut isumaqarfigaara. Nunatta inuiattut timersornikkut unammersuarterfissaattut taagussagutsigu soorunami takorloorpara nunatta karsia aningaasaleeqataassasoq, taamatullu aamma unammersuarterfissap Nuummi inissisimanissaa eqqarsaatigalugu Kommuneqarfik Sermersooq aningaasaleeqataasussatut pinissaa pissusissamisoorluinnartutut isumaqarfigalugit. Taakkua marlut avataasigut aningaasaleeqataasinnaasunik pissarsinissaq suleqatigiissitap pingaarnertut suliaasa ilagilluinnaraat tamatta isumaqatigiissutiginnaagunarparput.

Nunatta inuiattut timersornikkut unammersuarterfissaata qulisap "National stadionip" Nuummi inissisimanissaa siunnersuuteqartutut pingaartippara, tassami pilersaarummi pineqartumi tungavilersuutit pingaarutillit qularnaanerpaat amerlasuutigut ersersippaat Nuummi inissisimaguni inuiaqatigiinnut pitsaanerpaajussasoq. Soorunami aamma Nuuk nunatsinni illoqarfiit pingaarnersaattut inissisimavoq inuttunerpaajullunilu, taakkuinnaalluunniimmi aamma tungavissaqartippaatigut Nuummi inissisimanissaa qanoq pingaaruteqartigisoq.

Piffissanngorpoq nunatta timersornikkut nunarsuarmioqatigiit unammiaarnerinut angisuunut peqataasalernissaa, nunattalu issittumi inissisimanagera eqqarsaatigalugu "National stadion"-ip qulisaallunilu kiassagaasinnaanera pingaaruteqartorujussuusussaasut isumaqarpunga.

"Takorloorsiuk nunarput atletekimi 100 miiterimut oqilaniunnermi peqataatitaqartalersoq, takorloorsiuk nunarput 400 miiterimut oqilaniunnermi peqataatitaqartalersoq, takorloorsiuk nunarput Olympiademii unammiaaarutaasartut assinginiq peqataatitaqartalersoq, ilami aamma takorloorsiuk nunarput isikkamik arsaattartunit tusaamasaniq Eng-landimiit, Frankrigimiit, Spaniamiit, Brasiliamiit Argentinamiillu tikeraarneqarluni unammiaartorfigineqartalersoq. Takorluukkat immaqa ukiorpaaluit matuma siorna piviusorsiuunngitsutut isigineqarsinnaasut maanna takor-luuiunnaarluta timitaliinissatsinnut suligasuartaqalerpugut". Oqaatsit taakkua tassaapput 2015-imi pilersaarusiortoqarnissaanut siunnersuuteqaqqaarama ilaatigut oqariartuutigisama ilaat.

Pisortanut aningaasatigut allaffissornikkullu kingunerisassat:

Suleqatigiissitap sulinissaa, allaffissornikkut AC-t ukiumut sulinerannut marlunnut 1. Millionit koruunit nalinganut taggineqartumut, aningaasartuuteqarfigineqassasoq naatsorsuutigineqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Namminersorluni inuussutissarsiortunut aningaasatigut allaffissornikkullu siunnersuut kallaassanngilaq.

Innuttaasunut aningaasatigut allaffissornikkullu kingunerisassat:

Innuttaasunut aningaasatigut allaffissornikkullu siunnersuut kallaassanngilaq.